

Lomiga mo le Polokalame mo le Sauniga o le Faiva ma le Olaga Faa-Kerisiano

IUNI 3-9

'OA TAUTELE MAI I LE AFIOGA A LE ATUA | KALATIA 4-6

"Se Tala Faafaatusa' ma Lona Uiga mo i Tatou"

(Kalatia 4:24, 25) O nei mea o se tala faafaatusa; auā e faasino atu nei fafine i ni feagaiga se lua, o le tasi na faia i le Mauga o Sinai, lea na aumaia ai ni fanau e fai ma pologa, o Akara lea.²⁵ Ua faasino atu Akara iā Sinai, o se mauga i Arapi, ma ua tutusa o ia ma Ierusalem i aso nei, auā o loo nofo pologa o ia ma lana fanau.

it-1 1018 ¶2

Akara

E tusa ai o le faamatalaga a le aposetolo o Paulo, ua faataina mai e Akara i lenei talafaa-tusa le nuu o Israuelu faaletino, lea na noatia iā leova e ala i le feagaiga o le Tulafono lea na faavaeina i le mauga o Sinai, ma ua "aumaia ai ni fanau e fai ma pologa." O le tulaga agasala o tagata, na lē mafai ai e le nuu ona tausisia āiāiga o lenā feagaiga. O le iai o tagata Israuelu i lalo o le feagaiga o le tulafono e le'i avea ai i latou ma tagata sa'oloto, ae na ta'u-salaina ai o ni tagata agasala ua tatau i ai le oti. O lea, na avea i latou ma pologa. (Io 8:34; Ro 8:1-3) E tutusa Ierusalem i aso o Paulo ma Akara, auā o Ierusalem le laumua, na faaata mai ai le nuu o Israuelu faaletino, ma ua avea o ia ma lana fanau o ni pologa. Ae o Kerisiano ua faauuina i le agaga paia, o fanau ia a le "Ierusalem i lugā," le fafine faafaatusa a le Atua. O le Ierusalem i lugā e pei o Sara le fafine sa'oloto e le'i faapologaina lava o ia. Peita'i, e pei ona sauāina Isaako e Isamaeli, e faapena fo'i ona sauāina le fanau a le "Ierusalem i lugā" lea na tuusa'oloto e le Alo, e le fanau a le Ierusalem na faapologaina. E ui i

lea, o le tuliesea o Akara ma lana tama ua faaata mai ai le teena e leova o Israuelu faaletino e avea ma ona nuu.—Ka 4:21-31; taga'i fo'i i le loa 8:31-40.

(Kalatia 4:26, 27) A o Ierusalem i lugā e sa'oloto o ia, ma o ia o lo tatou tinā.²⁷ Auā ua tusia: "la fafia oe le fafine pā e lē fanau; inā alaga ia ma le olioli oe le fafine e le'i tigā i le tigā a fanau; auā e to'atele atu le fanau a le fafine ua tuulafoa'iina, nai lo o le fafine e nofotane."

w14 10/15 10 ¶11

la Mausalī Lou Faatuatua i le Malo

¶1 Sa iai se faataunuuga faaletino o le feagaiga ma Aperaamo i ē na tupuga mai iā te ia, ina ua latou ulu atu i le Nuu Folafolaina. Ua ta'ua i le Tusi Paia e iai fo'i se faataunuuga faaleagaga o lenā feagaiga. (Kala. 4:22-25) Na faagaeina le aposetolo o Paulo ma ia ta'ua e faapea, o le vaega autū o le fanau a Aperaamo, o lesu Keriso. O le vaega Iona lua e faasino atu i Kerisiano faauuina e 144,000. (Kala. 3:16, 29; Faaa. 5:9, 10; 14:1, 4) E faasino atu le fafine i "le Ierusalem i lugā," le vaega faalelagi o le faalapotopotoga a le Atua, lea e faia a'e i foa-foaga agaga faamaoni. (Kala. 4:26, 31) E pei ona folafolaina mai i le feagaiga ma Aperaamo, o le a aumaia e le fanau a le fafine faamanuiaga i tagata.

(Kalatia 4:28-31) Uso e, o i tatou o le fanau o le folafolaga e pei fo'i o Isaako.²⁹ O lē na fanau mai i le auala masani, na sauā o ia i na aso i lē na fanau mai e ala i le agaga, e faapena fo'i i aso nei.³⁰ Ae peita'i, o le ā le mea ua fai mai ai Tusitusiga Paia? "Inā tuliese ia le auauna teine ma lana tama, auā e lē mafai ona avea uma ma suli le tama a le auauna teine faatasi ma le tama a le fafine

sa'oloto." ³¹ O le mea lea le 'auuso e, o i tatou o fanau a le fafine sa'oloto, ae lē o le auauna teine.

Sa'ilī'iliga Loloto mo 'Oa Faaleagaga

(Kalatia 4:6) Ona o outou o atalii, ua auina mai ai e le Atua i totonu o o tatou loto le agaga paia lea na tuuina atu i lona Alo, ma ua alaga mai e faapea: "Ava, le Tamā e!"

w09 4/1 13

E te Silafia?

Aiseā na faaaogā ai e lesu le faaupuga "Ava, lo'u Tamā e," ina ua tatalo iā leova?

O le upu faa-Arama 'ab·ba" e mafai ona uiga atu i le "tamā" po o le "Tamā e." I taimi ta'i-tasi e tolu ia e alia'e mai ai lea faaupuga i le Tusi Paia, e lē gata o le vaega o se tatalo, ae o loo faaaogā fo'i e faasino atu i le Tamā i le lagi, o leova. O le ā le uiga o lenei upu?

Ua ta'ua i le *International Standard Bible Encyclopedia* e faapea: "I le gagana i aso fai-soo i taimi o lesu, sa tele lava ina faaaogā le upu 'Ava, le Tama e,' o se faaupuga o se faiā vavalalata, ma o se faaupuga e faaalia ai le faaaloalo o tamaiti i o latou tamā." O se faaupuga o lagona faapelepele e tautala ai se tasi i sona tamā, ma o se tasi lea o upu e muamua lava ona a'oā'oina e se tamaitiiti. Sa faaaogā e lesu lenei faaupuga i sana tatalo faatauanau i lona Tamā. I le faato'aga i Ketesemane, i ni nai itula a o le'i maliu o ia, na faalagi ai e lesu leova i lana tatalo i upu e faapea, "Ava, lo'u Tamā e."—Mareko 14:36.

Ua ta'ua atili i le lomifefilo i le Tusi Paia na ta'ua i luga e faapea, "O le faaaogāina o le faaupuga 'Ava, le Tamā e,' o se auala e talanoa ai i le Atua, sa seāseā ona faaaogāina i tusi faalutaia sa iai i vaitaimi o Eleni ma Roma, ona e foliga mai o se lē faaaloalo le talanoa i le Atua i lenei faaupuga soona māfana tele." Peita'i, "o le faaaogāina . . . e lesu o lenei faaupuga i lana tatalo, o se faamautinoaga lea e ta'u mai ai le iai o se la faiā vavalalata ma le Atua." O isi

mau e lua o loo ta'ua ai le upu "Ava, le Tama e,"—i tusitusiga uma a le aposetolo o Paulo —ua faaalia mai ai sa faaaogā fo'i e Kerisiano i le ulua'i senituri lea faaupuga i a latou tatalo. —Roma 8:15; Kalatia 4:6.

(Kalatia 6:17) O lea, aua ne'i faalavelave mai se tasi iā te a'u, auā ua ou tauave i lo'u tino le faailoga o se pologa a lesu.

w10 11/1 15

E te Silafia?

O le ā le uiga o upu a le aposetolo o Paulo ua ia tauave i lona tino "le faailoga o se pologa a lesu"?—**Kalatia 6:17.**

■ Atonu na eseese manatu o tagata o le ulu-a'i senituri i na upu a Paulo. O se faaa'oa'oga, sa faaaogā i aso anamua se u'amea aasa e faailoga ai pagota o le taua, 'aufaomea o malumalu ma pologa na sosola. Ina ua faia faapea i tagata, sa manatu i ai i le faailoga o se luma mo i latou.

Peita'i, e lē o taimi uma na manatu ai i na faailoga e leaga. O le to'atele o tagata anamua na faaaogā na mea e iloa ai o i latou o ni tagata o se ituiga po o se lotu. O se faaa'oa'oga, e tusa ai o le *Theological Dictionary of the New Testament*, "na iloa ua tuuina atu tagata Suria i atua o Hatata ma Atakati, e ala i faailoga na susunu i o latou tapulima po o ua . . . Na susunu se ata o se laulaau i tino o ē e tapua'i iā Dionysus."

Ua faapea mai le to'atele o le 'aufaitofā i aso nei, sa faasino atu Paulo i ma'ila i lona tino na māfua mai i sauāga na oo iā te ia, a o fai lana galuega faamisionare. (2 Korinito 11:23-27) Peita'i, atonu sa faasino atu Paulo i lona olaga lea na iloa ai o ia o se Kerisiano, ae e lē o ni ma'ila o le tino.

Faitau Tusi Paia

(Kalatia 4:1-20) Ou te fai atu fo'i e faapea, a o la'itiiti le suli, e leai lava se mea e ese ai o ia ma le pologa, e ui lava o ia o le alii o

mea uma lava, ² ae ua pule iā te ia o tane ma auaua pule se'ia oo i le aso na mua'i tofia e lona tamā. ³ Na faapea fo'i a o tatou laiti, na faapologaina pea i tatou i mataupu faavae a le lalolagi. ⁴ Ae ina ua atoa le taimi na atofaina, ona auina mai ai lea e le Atua o lona Alo, o lē na fanau mai i se fafine ma sa nofo i le tulafono, ⁵ ina ia faasa'olotoina i latou o ē e nonofo i le tulafono e ala i le faatauina o i latou, ina ia avea fo'i i tatou ma atalifai. ⁶ Ona o outou o atalii, ua auina mai ai e le Atua i totolu o o tatou loto le agaga paia lea na tuuina atu i lona Alo, ma ua alaga mai e faapea: "Ava, le Tamā e!" ⁷ O lea, ua lē toe avea ai oe ma pologa, a o le atalii; afai o oe o le atalii, o le suli fo'i lea ona o le Atua. ⁸ Ae peita'i, ina o outou lē iloa le Atua, na outou nofo pologa ai i mea e lē o ni atua. ⁹ A o lenei ua outou iloa le Atua, ae o le mea tāua, ua iloa outou e le Atua, e faapefea la ona outou toe liliu atu i mea muamua e faatauvaa ma lē aogā, ma manana'o e toe fai outou ma pologa i na mea? ¹⁰ Ua outou matuā naunau e faamanatu aso, ma masina, ma tau, ma tausaga. ¹¹ Ou te popole iā te outou, ina ne'i i'u ina lē aogā la'u galuega na faia iā te outou. ¹² Uso e, ou te 'ai'oi atu iā te outou, la outou pei o a'u, auā na ou pei fo'i o outou. E leai se mea sesē na outou faia iā te a'u. ¹³ Ae ua outou iloa, o lo'u ma'i na ala ai ona ou mua'i folafola atu le tala lelei iā te outou. ¹⁴ E ui lava o se tofotofoga iā te outou lo'u ma'i, ae e tou te le'i agaleaga pe 'ino'ino mai iā te a'u; a ua outou talia a'u faapei o se agelu a le Atua, e pei fo'i o Keriso lesu. ¹⁵ O fea ea lo outou fafia na iai muamua? Auā ua ou iloa, pe ana outou mafaia, semanū ua outou sali ese o outou mata ma aumai iā te a'u. ¹⁶ O lea la, po ua avea ea a'u ma o outou fili auā ua ou ta'u atu le upu moni iā te outou? ¹⁷ E lē lelei le māfuaaga ua latou naunau atu ai iā te outou, ma ua ma-

nana'o ai e vavaeese outou mai iā te a'u, ina ia outou naunau atu iā i latou. ¹⁸ Ae e lelei pe a naunau atu isi iā te outou i taimi uma lava ona o se māfuaaga lelei, ae e lē na o le taimi lea ou te iai iā te outou, ¹⁹ si a'u fanau e, ua ou tigā ona o outou, e pei o le tigā o se fafine o le a fanau, se'ia afuafua Keriso i totonu iā te outou. ²⁰ Ae ma'imau pe ana tatou faatasi i le taimi nei, ma ou tautala atu iā te outou i se leo mālū, auā ua ou lē iloa le mea a fai iā te outou.

IUNI 10-16

'OA TAUTELE MAI I LE AFIOGA A LE ATUA | EFESO 1-3

"Le Pulega a leova ma Mea ua Faataunuina Ai"

(Efeso 1:8, 9) O le mea lenā na ia matuā foa'i mai ai iā i tatou, faatasi ma le atamai uma ma le faautauta, ⁹ ina ua ia faailoa mai iā i tatou le mea lilo paia o lona finagalo. O lona finagalo lenei e tusa ma lona faanau-nauga

it-2 837 ¶4

Mea Lilo Paia

Le Malo Faa-Mesia. I tusitusiga a Paulo, o loo ia faamatala manino ai le faaaliga i le mea lilo paia e faatatau i le Keriso. I le Efeso 1:9-11, na talanoa ai Paulo e faatatau i le faailoaina mai e le Atua o "le mea lilo paia" o lona finagalo. Na ia faapea mai: "O lona finagalo lenei e tusa ma lona faanau-nauga mo se pulega i le atoaga o le taimi na atofaina, o lona uiga, ina ia aoaoina ai mea uma lava ma toe faatasia iā Keriso, o mea o loo i le lagi ma mea o loo i le lalolagi. Ioe, ua aoaoina mea uma iā te ia ina ia matou autasi ma ia, o i matou fo'i ua tofia e avea ma suli, auā na mua'i tofia i matou e tusa ma le finagalo o lē ua galuea'iina mea uma, e tusa ma lana filifiliqa." O lenei "mea lilo paia" e aofia ai se pulega, o le Malo faa-Mesia

lea o le Atua. “O mea o loo i le lagi” lea na ta’ua e Paulo, e faasino i ē o le a avea ma suli faatasi ma Keriso i le Malo i le lagi. Ae o “mea o loo i le lalolagi,” o ona tagatānuu i le lalolagi. Na faailoa atu e lesu i ona soo o lenei mea lilo paia e fesoota’i atu i le Malo, ina ua ia fetalai: “Ua tuuina atu iā te outou mea lilo paia o le malo o le Atua.”—Mar 4:11.

(Efeso 1:10) mo se pulega i le atoaga o le taimi na atofaina, o lona uiga, ina ia aoaoina ai mea uma lava ma toe faatasia iā Keriso, o mea o loo i le lagi ma mea o loo i le lalolagi. Ioe, ua aoaoina mea uma iā te ia

w12 7/15 27-28 ¶3-4

“O leova e To’atasi Lava la” ua Aoaoina Lona ‘Auaiga

³ Na faailoa atu e Mose iā Israelu: “O leova lo tatou Atua, o leova e to’atasi lava ia.” (Teu. 6:4) E gaoioi leova e faataunuu lana fuafuaga. Ua ia sauniunia ana foafoaga i le lagi ma le lalolagi ina ia autasia o se aiga e tasi. E ta’ua nei sauniuniga o “se pulega.” (**Faitau le Efeso 1:8-10.**) O lenei pulega e lua ona vaega. O le vaega muamua ua sauniunia ai le vaega faauuina, ina ia soifua i le lagi i lalo o le ta’ita’iga a lo latou Ulu o lesu Keriso. Na amata lenei vaega i le Penetekoso 33 T.A., ina ua amata ona aoaoina e leova i latou e pule faatasii ma Keriso i le lagi. (Galu. 2:1-4) Ua latou iloa ua vaetamaina i latou e avea ma “fanau a le Atua,” ona ua ta’umiotonuina i latou i le taulaga togiola a Keriso.—Roma 3:23, 24; 5:1; 8:15-17.

⁴ Ua sauniunia e le vaega lona lua o le pulega, i latou o le a ola i le lalolagi Parataiso i le Malo faa-Mesia a Keriso. O le a avea le “motu o tagata e to’atele” ma faavae o lenā vaega. (Faaa. 7:9, 13-17; 21:1-5) O le a faamaonia atili e le sauniuniga o le toetū lo tatou autasi. A o faagasolo le Pulega o le Afe Tausaga, o le a ola faatasii le motu o tagata e to’atele ma le faitau piliona o i latou o le a toe faatutūina mai.

(Faaa. 20:12, 13) I le i‘uga o le afe tausaga, o le a tuuina atu ai “mea o loo i le lalolagi” i le tofotofoga mulimuli. O i latou o le a faamaonia lo latou faamaoni, o le a vaetamaina e avea ma “fanau a le Atua” i le lalolagi.—Roma 8:21; Faaa. 20:7, 8.

Sa’ili’iliga Loloto mo ‘Oa Faaleagaga

(Efeso 3:13) O le mea lea ou te talosaga atu ai, ia aua ne’i outou faavaivai i nei puapuaga ua oo iā te a’u ona o outou, auā o nei mea e faamamaluina ai outou.

w13 2/15 28 ¶15

Taofimau le Mamalu Mai le Atua

¹⁵ O lo tatou tutumau, o se tasi lea o auala e fesoasoani ai i isi e maua le mamalu o le Atua. Na tusi Paulo i le faapotopotoga i Efeso e faapea: “Ou te talosaga atu ai, ia aua ne’i outou faavaivai i nei puapuaga ua oo iā te a’u ona o outou, auā o nei mea e faamamaluina ai outou.” (Efe. 3:13) Na faapefea i puapuaga o Paulo ona faamamaluina ai le faapotopotoga i Efeso? O lona auauna i ona uso e ui i puapuaga, na faailoa atu ai e sili ona tāua i le olaga o se Kerisiano lana auaunaga. Pe ana faavaivai Paulo, atonu e ono mafaufau uso e lē tāua la latou faauōga ma leova, o la latou faiva, faapea lo latou faamoemoe. O le tumau o Paulo, na faailoa atu ai o le avea ma soo o Keriso e sili atu nai lo o se isi lava faataulaga.

(Efeso 3:19) ma ia iloa le alofa o Keriso lea e sili atu i le poto, ina ia faatutumuina outou i le tumu uma lava ua foa’i mai e le Atua.

cl 299 ¶21

“Ia Iloa Fo’i le Alofa o Keriso”

²¹ O le upu Eleni ua faaliliuina i le “ia iloa” o lona uiga, ia iloa “i se tulaga aogā, e ala i le faatinoina.” E mafai ona tatou faaalia le alofa i le auala fo’i na faaalia ai e lesu. E faapefea? Ia fesoasoani atu ma le lē manatu faapito i isi, ia fesoasoani atu ma le alofa i o latou ma-

na'oga, ma ia moni lo tatou faamagaloina o ni o latou sesē. O le faia faapea, o le a mafai ai ona tatou malamalama lelei i ona faalogona. Ona o le faatinoina o nei mea, ua tatou 'iloa ai le alofa o Keriso ua sili sili ese e lē mailoa.' Aua lava ne'i galo iā i tatou, o le tele o lo tatou faata'ita'i atu iā Keriso, o le atili fo'i lea ona tatou faalatalata atu i lē ua matuā faata'ita'ia lelei e lesu, o leova, lo tatou Atua alofa.

Faitau Tusi Paia

(Efeso 1:1-14) O a'u o Paulo, o le apostolo a Keriso lesu e ala i le finagalo o le Atua, o le tusi lenei i le 'aupai o i Efeso ma ē faamaoni ua autasi ma Keriso lesu: ² Tau ina ia iā te outou le agalelei faifua ma le filemu mai i le Atua lo tatou Tamā, ma le Alii o lesu Keriso. ³ Ia viia le Atua, o le Tamā lea o lo tatou Alii o lesu Keriso, auā ua ia faamanuiaina i tatou i manuia faaleagaga uma i mea o i le lagi, i le autasi ma Keriso, ⁴ auā a o le'i faavaeina le lalolagi, na ia filifilia ai i tatou ia autasi ma Keriso, ina ia paia i tatou ma ia lē ponā i ona luma i le alofa. ⁵ Auā na ia muā'i tofia i tatou e avea ma ona lava ataliifai e ala iā lesu Keriso, e tusa ma le mea ua ia finagalo malie i ai, ⁶ e viia ai lona agalelei faifua lea e mamalu, na ia foa'i mai ma le agalelei iā i tatou e ala i lona Alo pele. ⁷ Ua ia faasa'olotoina i tatou i le togiola e ala i lona toto, ioe, o le faamagaloina o a tatou agasala e tusa ma le matuā tele o lona agalelei faifua. ⁸ O le mea lenā na ia matuā foa'i mai ai iā i tatou, faatasi ma le atamai uma ma le faautauta, ⁹ ina ua ia faailoa mai iā i tatou le mea lilo paia o lona finagalo. O lona finagalo lenei e tusa ma lona faanaunauga ¹⁰ mo se pulega i le atoaga o le taimi na atofaina, o lona uiga, ina ia aoaoina ai mea uma lava ma toe faatasia iā Keriso, o mea o loo i le lagi ma mea o loo i le lalolagi. Ioe, ua aoaoina mea uma iā te ia ¹¹ ina ia matou autasi ma ia, o i matou fo'i ua tofia e avea ma suli, auā

na muā'i tofia i matou e tusa ma le finagalo o lē ua galuea'iina mea uma, e tusa ma lana filifiliga, ¹² ma e ala iā i tatou o ē na muamua ona faamoemoe iā Keriso, ua viia ma faamamaluina ai le Atua. ¹³ Ua outou faamoemoe fo'i iā te ia ina ua outou faalogo i le upu moni, o le tala lelei lea i lo outou faaolataga. Ina ua outou talitonu, ona faamaufaailogaina ai lea o outou e ala iā te ia i le agaga paia lea na folafolaina mai, ¹⁴ o le faamaoniga lea na tuuina mai muamua o lo tatou tofi, ina ia faasa'olotoina ai tagata o le Atua e ala i le togiola, ina ia viia ai lona mamalu.

IUNI 17-23

'OA TAUTELE MAI I LE AFIOGA A LE ATUA | EFESO 4-6

"Ia Oofu i le Ofutau Atoatoa Mai i le Atua"

(Efeso 6:11-13) la oofu i le ofutau atoatoa mai i le Atua, ina ia mafai ai ona outou tutū mausali e tetee atu i togafiti a le Tiapolo; ¹² auā tatou te lē o tau ma tagata a o malo, ma pule, ma ta'ita'i o le lalolagi o loo pulea lenei lalolagi pogisa, ma agaga leaga uma i mea o i le lagi. ¹³ O le mea lea, ia oofu ai i le ofutau atoatoa mai i le Atua, ina ia mafai ona outou tetee atu pe a oo i le aso leaga, ma ia outou tutū mausali ai pe a uma ona outou faia māe'ae'a o nei mea uma.

w18.05 27 ¶1

Talavou—la Tutū Mausali e Tetee Atu i le Tiapolo

NA FAATUSA e le apostolo o Paulo o tatou olaga o ni Kerisiano i ni fitafita o loo tau i se taua. O loo tatou tau i se taua faaleagaga, ma e iai moni lava o tatou fili. O Satani ma temoni o ni fili malolosi ma e tele lo latou tomai. Atonu e foliga mai e lē mafai ona tatou manumalo iā i latou, aemaise lava talavou Kerisiano. E ono foliga atu e leai so latou puipuiga. Pe e mafai ona latou manumalo i nei agaga leaga

malolosi? loe e mafai, ma o loo latou manu-malo i lenei taua. Aiseā? Talu ai e latou te ‘maua pea le mana mai i le Atua.’ Peita‘i, e lē tau na o lo latou faalagolago i le mana o le Atua. Ua faaaauupegaina i latou mo lenei taua. I le pei o fitafita e toleni lelei, ua latou “ooofu i le ofutau atoatoa mai i le Atua.”—**Faitau le Efeso 6:10-12.**

(Efeso 6:14, 15) O lenei, ia tutū mausalī, a o fusia o outou sulugātiti i le upu moni, ma oofu i le ufifatafata o le amiontu, ¹⁵ ia faaseevaeina o outou vae e nofosauni e tala‘i le tala lelei o le filemu.

w18.05 28-29 ¶4, 7, 10

Talavou—la Tutū Mausalī e Tetee Atu i le Tiapolo

⁴ I se tulaga talitutusa, o upu moni o loo tatou a‘oa‘oina mai i le Afioga a le Atua e puipuia ai i tatou mai i lamatiaga faaleagaga ia e māfua mai i a‘oa‘oga pepelo. (Ioa. 8:31, 32; 1 Ioa. 4:1) O le tele e tatou te naunau ai i upu moni mai i le Tusi Paia, o le faigofie fo‘i lenā ona tatou ofuina o lo tatou “ufifatafata,” po o le ola lea i tapulaa amiontu a le Atua. (Sala. 111:7, 8; 1 Ioa. 5:3) O lo tatou mauaina fo‘i o se malamalamaga sa‘o i upu moni mai i le Afioga a le Atua, o le a mafai ai ona tatou tutū atu ma le lototetele e puipui na upu moni mai i tagata tetee.—1 Pete. 3:15.

⁷ Ma‘eu le talafeagai o lenā faata‘ita‘iga o le auala e mafai ai e tapulaa amiontu a leova ona puipuia o tatou loto! (Faata. 4:23) E lē fesuia‘ia e se fitafita le ufifatafata e faia mai i u‘amea malolosi mo se isi ufifatafata e faia mai i ni u‘amea vaivai. E faapena fo‘i ona tatou lē manana‘o e suia tapulaa amiontu a leova ina ia fetoui ma mea e tatou te manatu e sa‘o. E lē lava le atamai o loo iā i tatou e puipuia ai o tatou loto. (Faata. 3:5, 6) O le māfuaaga lea e mana‘omia ai ona tatou faamautinoa mai i lea taimi i lea taimi, o loo puipuia pea o tatou loto e lo tatou “ufifatafata.”

¹⁰ Na fesoasoani seevae o fitafita Roma iā i latou e savavali ai i le taua. I se tulaga talitutusa, e fesoasoani fo‘i seevae faafaatusa o loo faia e Kerisiano e latou te folafola atu ai le fe‘au o le filemu. (Isa. 52:7; Roma 10:15) Peita‘i, e mana‘omia le lototele e tala‘i atu ai pe a maua le avanoa. Ua faapea mai Bo e 20 tau-saga, “Na ou fefe e tala‘i i tamaiti o la matou vasega. Sa ou lagona le māsiasi. Ae pe a ou toe mafaufau i ai, ou te lē iloa pe aiseā na ou mā ai fua. O le taimi lenei ua ou fiafia e tala‘i i isi.”

(Efeso 6:16, 17) A o le mea e sili ona tāua, ia outou ave le talita telē o le faatuatua, lea e mafai ai ona outou tineia ai aū fanafana mū uma a lē o loo leaga. ¹⁷ la talia fo‘i le puloutau o le faaolataga, ma le pelu a le agaga, o le afioga lea a le Atua,

w18.05 29-31 ¶13, 16, 20

Talavou—la Tutū Mausalī e Tetee Atu i le Tiapolo

¹³ O nisi o “aū fanafana mū” e ono faaaogā e Satani e osofa‘ia ai oe, o tala pepelo e faata-tau iā leova e faapea, e lē manatu mamafa ma alofa mai o la iā te oe. E tauivi Ida e 19 tau-saga ma faalogona o le leai o se aogā. Ua ia faapea mai, “E masani ona ou manatu e lē o vavalalata mai leova iā te a‘u ma e lē mana‘o e avea ma a‘u Uō.” E faapefea ona ia taulima-inna na ituaiga o mafaufauga? Ua faapea mai Ida: “E fesoasoani sauniga e matuā faamalo-sia ai lo‘u faatuatua. E masani lava e na o lo‘u auai i sauniga ae e lē faia ni a‘u tali, ma le manatu e leai se isi e fia faalogo mai i ni a‘u tali. Ae o le taimi lenei, ou te sauniuni mo sauniga ma taumafai e fai ni a‘u tali se lua pe tolu. E faigatā, ae ou te lagona le fiafia pe a ou faia faapea. E matuā faalaeiauina a‘u e uso ma tuafāfine. O so o se taimi lava e uma ai le sau-niga, ou te lagonaina le alofa o leova iā te a‘u.”

¹⁶ E pei lava ona puipuia e se puloutau le fai‘ai o se fitafita, e mafai fo‘i e lo tatou “faa-

moemoe i le faaolataga” ona puipuia o tatou mafaufau. (1 Tesa. 5:8; Faata. 3:21) E fesoasoani le faamoemoe iā i tatou ina ia taulā'i atu ai pea i folafolaga a le Atua, ma iai se vaaiga sa'o i o tatou faafitauli. (Sala. 27:1, 14; Galu. 24:15) Ae ina ia mafai ona aogā lo tatou “puloutau,” e tatau ona fai le pulou ae e lē o le uu i o tatou lima.

20 Ua faatusaina e Paulo le Afioga a le Atua i se pelu ua tuuina mai e leova iā i tatou. Ae e mana'omia ona tatou iloa le auala e faaaogā ai ma le poto pe a puipuia o tatou talitonuga, pe fetuuna'i fo'i o tatou manatu. (2 Kori. 10: 4, 5; 2 Timo. 2:15) E faapefea ona e faaleleia ou tomai i le auala e faaaogā ai le Afioga a le Atua? Ua faapea mai Sebastian e 21 tausaga, “Pe a fai la'u faitauga Tusi Paia, e ta'itasi fuai-upu ou te tusiina i lalo mai i mataupu ta'itasi. O loo o'u faia se lisi o mau e sili ona ou fiafia i ai. O le faia faapea, e fesoasoani iā te a'u e atili malamalama ai i manatu o leova.” Ua faapea mai Daniel lea na ta'ua i se tasi o palakalafa, “Pe a fai la'u faitauga Tusi Paia, ou te filifilia mau ou te manatu o le a fesoasoani i tagata ou te feiloa'i i ai i le tala'iga. Ua ou mātauina e talilelei mai tagata pe a vaai mai e te matuā naunau i le Tusi Paia, ma faia le mea sili e fesoasoani atu ai iā i latou.”

Sa'ili'iliga Loloto mo 'Oa Faaleagaga

(Efeso 4:30) Aua fo'i tou te faatigā i le agaga paia o le Atua, ua faamaufaailogaina ai outou mo le aso e faasa'olotoina ai e ala i le togiola.

it-1 1128 ¶3

Paia

Agaga Paia. O le mana galue po o le agaga o leova, lea e na te faatonutonuina ma e faataunuina le mea e finagalo i ai o ia. O lenā agaga e mamā, lē ponā, paia, ma ua tuuuese mo le faaaogāina e leova. O le mea lea e ta'ua ai o le “agaga paia” ma le “mana o le agaga paia.”

(SI 51:11; Lu 11:13; Ro 1:4; Efe 1:13) Pe a galue i se tasi, o le a avea ai lenā agaga ma uuna'iga mo le paia, po o le mamā. O so o se gaoioiga sesē pe lē mamā e tatou te faia, e mafai ona i'u atu ai i lo tatou teena pe “faatigā” i le agaga paia. (Efe 4:30) E ui o le agaga paia e leai se tino, ae mafai lava ona tatou “faatigā” i ai. Talu ai o le agaga paia o loo fuaina mai fua e atagia mai ai uiga paia o le Atua, o le faatigā la i le agaga paia, o le faatigā fo'i lenā iā leova. O le faia o so o se gaoioiga sesē, e masani ona i'u atu ai i le 'tineia o le mumū o le agaga.' (1Te 5:19) Pe afai e faaauau pea, e mafai ona tatou faatigā ai i le agaga paia o le Atua, ma i'u ina suia ai leova e fai ma fili o lē fouvale. (Isa 63:10) E mafai e se tasi o loo faatigā i le agaga paia ona oo lava ina upuleaga i le agaga paia, o se agasala lea na ta'ua e lesu Keriso e lē mafai ona faamagaloina i le taimi nei atoa ma le lumana'i.—Mat 12:31, 32; Mar 3:28-30.

(Efeso 5:5) Auā ua outou iloa ma malamalama lelei i lenei mea, o sē e faitaaga, pe amio lē mamā, po o lē e matape'ape'a, o lona uiga o le tagata e ifo i tupua lea, e lē fai mo latou tofi le malo o le Keriso ma le Atua.

it-1 1006 ¶2

Matape'ape'a

E Faaalia i Gaoioiga. E faaalia le matape'ape'a e ala i ni gaoioiga iloagofie lea e iloa atu ai ni tu'inanauga sesē o loo iai i se tasi, ma lona matuā mana'ona'o i le tele o mea. Na ta'ua e lakopo o se tusitala o le Tusi Paia pe a tō lenā tu'inanauga sesē, ona fanau mai ai lea o le agasala. (la 1:14, 15) O lea la, e iloa le tagata matape'ape'a i ana gaoioiga. Na ta'ua e le aposetolo o Paulo o le avea o se tasi ma sē e matape'ape'a, e tusa lenā ma sē e ifo i tupua. (Efe 5:5) O tu'inanauga matape'ape'a o se tasi e na te avea ai se mea o loo tu'inanau i ai ma ona atua, ma ua faamuamua lenā mea nai lo o le tapua'iga ma le auaunaga i Lē na Foafaina Mea.—Ro 1:24, 25.

Faitau Tusi Paia

(Efeso 4:17-32) O lea, ou te fai atu iā te outou ma ta'utino atu lenei mea i luma o le Alii, aua tou te toe savavali e pei o tagata o le lalolagi o ē o loo savavali i le pōuliuli o o latou mafaufau,¹⁸ a o pogisa pea o latou mafaufau, ma vavaeese i latou i le ola mai i le Atua, ona o le valea ua iā i latou ma le maaa o o latou loto.¹⁹ Ona ua lē toe lagona e i latou le mā, ua latou faia ai amioga matagā, ma amioga lē mamā uma ona o le mana'o tele.²⁰ A ua a'oa'oina outou e lē faapena le Keriso,²¹ pe afai e moni na outou faalogo iā te ia ma a'oa'oina outou e ia, e tusa ma le upu moni na a'oa'oina e lesu,²² ia outou tuu ese le tagata tuai e tusa ai ma a outou amioga sa faia muamua, lea ua faaleagaina i ona tu'inanauga taufaasesē;²³ a ia faafouina le malosi e pulea ai o outou mafaufau,²⁴ ma ia oofu i le tagata fou na foafoaina e tusa ma le finagalo o le Atua, i le amiotonu moni ma le faamaoni.²⁵ O lenei, ona ua outou tuu ese le pepelo, ia ta'itasi outou ma tautala i le mea moni ma lona tuaoi, auā o i tatou o itutino o le tino e tasi.²⁶ Pe a outou ita, aua ne'i agasala ai, aua ne'i goto le lā o tumau pea lo outou ita,²⁷ aua fo'i ne'i tuua e outou se mea e mautū ai le Tiapolo.²⁸ O lē e gaoi, aua ne'i toe gaoi, a ia galue mamafa o ia, ma ia faia e ona lima galuega lelei, ina ia mafai ai ona ia avatu ni mea i se tagata mativa.²⁹ Ia aua ne'i alu atu se upuleaga mai i o outou gutu, a ia fai atu ni upu lelei e atia'e ai i taimi e tatau ai, ina ia aogā i ē o faalogologo i ai.³⁰ Aua fo'i tou te faatigā i le agaga paia o le Atua, ua faamaufaailogaina ai outou mo le aso e faasa'olotoina ai e ala i le togiola.³¹ Ia tuu lo outou ita umi, ma le itaitagofie, ma le lotoa, ma le soona 'e'ē, ma upu masoā, atoa fo'i ma mea leaga uma.³² Ae ia agalelei le tasi i le isi, ia māfana lo outou alofa, ma ia fefaamagaloa'i ma le lotoatoa, e pei ona fina-

galo malie le Atua e faamagaloina outou e ala iā Keriso.

IUNI 24-30

'OA TAUTELE MAI I LE AFIOGA A LE ATUA | FILIPI 1-4

"Aua Ne'i Popole i se Mea"

(Filipi 4:6) Aua ne'i popole i se mea, ae ia faailoa atu o outou mana'oga i mea uma lava i le Atua, i le tatalo ma le faatoga, atoa ma le faafetai;

w17.08 10 ¶10

O le "Filemu Mai i le Atua, e Silisili i Mea Uma Lava e Manatu i Ai"

¹⁰ O le ā e fesoasoani iā i tatou ia lē popole ai i so o se mea ma maua le "filemu mai i le Atua"? Ua faaalia mai i upu a Paulo i Kerisiano i Filipi, o le vaifofō o le popole o le tatalo. O lea, pe a tatou popole, ia tatalo. **(Faitau le 1 Peteru 5:6, 7.)** la tatalo atu ma le faatuatua atoatoa iā leova i le iloaina e manatu mamafa mai iā te oe. Ia tatalo atu iā te ia "ma le faafetai," ma ia manatua faamanuiauga ua tatou maua. O le a atili faamalosia lo tatou mautinoa iā te ia pe a manatua, e mafai ona ia faia "mea e matuā sili atu i lo o mea tatou te talosaga atu ai pe e mafaufau i ai."—Efe. 3:20.

(Filipi 4:7) ona leoleoina ai lea o o outou loto ma mafaufau i le filemu mai i le Atua, e silisili i mea uma lava e manatu i ai, e ala iā Keriso lesu.

w17.08 10 ¶7

O le "Filemu Mai i le Atua, e Silisili i Mea Uma Lava e Manatu i Ai"

⁷ E mautinoa ina ua faitau uso i Filipi i le tusi a Paulo iā i latou, na latou manatua le mea na tupu iā te ia ma le auala na gaoioi ai leova, lea e latou te le'i faatalitalia. O le ā le lesona na a'oa'o atu e Paulo iā i latou? Pe a faafaigo-

fie: Aua le popole. la tatalo, ona outou maua ai lea o le filemu mai i le Atua. Ae ia mātau, o le “filemu mai i le Atua, e silisili i mea uma lava e manatu i ai.” O le ā lona uiga? Ua faaliliu e nisi tagata lenei faaupuga e faapea, “e silisili i mea uma lava e tatou te moomoo i ai” pe “e silisili i fuafuaga uma a tagata.” O le uiga o le manatu o Paulo, o so o se mea e tatou te mafaufau i ai, e lē mafaatusalia i le “filemu mai i le Atua.” Atonu i manatu o tagata, e lē mafai ona tatou sao mai i o tatou faafitauli. Peita'i, i le silafaga a leova e mafai ona tatou sao mai ai, ma e mafai fo'i ona ia gaoioi i auala e sili atu i lo o mea e faatalitalia.—**Faitau le 2 Peteru 2:9.**

w17.08 12 ¶16

O le “Filemu Mai i le Atua, e Silisili i Mea Uma Lava e Manatu i Ai”

¹⁶ O le ā le faamanuiaga o lo tatou mauaina o le “filemu mai i le Atua, e silisili i mea uma lava e manatu i ai”? Ua ta'ua i le Tusi Paia o le a ‘leoleoina ai o tatou loto ma mafaufau e ala iā Keriso Iesu.’ (Fili. 4:7) O le upu i le ulua'i gagana mo le “leoleoina,” o se upu sa faaaogā e vaega'au. Sa faasino atu i se vaega o fitafita sa tofia e leoleoina se aai malupuipuia i aso anamua, e pei o le aai o Filipi. Na momoe saogalemu tagata o Filipi i le pō ona na latou iloa o loo leoleo e fitafita faitoto'a o le aai. I se tulaga talitutusa, pe a iā i tatou le “filemu mai i le Atua,” o le a faaaauau ona to'afimālie o tatou loto ma mafaufau. E tatou te iloa e manatu mamafa mai leova iā i tatou ma e finagalo ia tatou tau-lau manuia. (1 Pete. 5:10) O le iloaina o lenā mea e puipuia ai i tatou mai i le lofitūina i le popole ma le lotovaivai.

Sa'ilii'liga Loloto mo 'Oa Faaleagaga

(Filipi 2:17) Ae e ui lava ua liligiina a'u e pei o se taulaga i meainu, i luga o la outou auaunaga lea ua outou faia ona o lo outou

faatuatua, ua ou fiafia ma ou olioli faatasi ma outou uma.

it-2 528 ¶5

Taulaga

Taulaga i meainu. O taulaga i meainu na ofoina atu faatasi ma le tele o isi taulaga, ae-maise lava ina ua nofoia e tagata Isaraelu le Nuu Folafolaina. (Nu 15:2, 5, 8-10) O taulaga i meainu e aofia ai le uaina (“‘ava malosi”) ma na sasaa i luga o le fata faitaulaga. (Nu 28: 7, 14; faatusatusa i le Eso 30:9; Nu 15:10.) Na tusi atu le aposetolo o Paulo i Kerisiano i Filipi: “[Pe afai] ua liligiina a'u e pei o se taulaga i meainu, i luga o la outou auaunaga lea ua outou faia ona o lo outou faatuatua, ua ou fiafia.” I inei, na ia faaaogā faafaaatusa ai taulaga i meainu e faamatala ai lona lotomalie e faaaogā lona malosi, taimi ma alaga'oa mo ona uso Kerisiano. (Fil 2:17) A o toeitiiti oo i lona maliu na ia tusi atu iā Timoteo: “Ua liligiina atu a'u e pei o se taulaga i meainu, ma ua lata le taimi e faasa'olotoina ai a'u.”—2Ti 4:6.

(Filipi 3:11) ina ia iloa ai pe e mafai lava ona ou maua le ulua'i toetū mai i le otī.

w07 1/1 26-27 ¶5

“Le Ulua'i Toe Tū”—O Loo Faagasolo Nei!

⁵ Ona sosoo lea ma sui faauuina o “le Isara-elu o le Atua,” lea e tatau ona aufaatasi atu i latou i le Alii o lesu Keriso i le mamalu faa-lelagi, o inā o le a latou ‘faatasi ai pea lava ma le Alii.’ (Kalatia 6:16; 1 Tesalonia 4:17) E ta'ua lenā mea o “le ulua'i toe tū.” (Faaaliga 20:6) Pe a māe'a lenā toe tū, ona oo loa lea i le taimi mo le toe faatutūina mai i le lalolagi o le faitau miliona, o ē ua iai le faamoemoe e ola e faavavau i le Parataiso. O lea la, pe tatou te faamoemoe e ola i le lagi pe i le lalolagi, ae tatou te naunau uma lava e fia iloa “le ulua'i toe tū.” O le ā lenā ituaiga o toe tū? O afea e tupu ai?

Faitau Tusi Paia

(Filipi 4:10-23) Ou te matuā olioli i le autasi i le Alii, ona o lea ua outou toe mafaufau mai ai iā te a'u, lea fo'i sa outou manatunatu i ai, ae e le'i maua se avanoa e faaalia mai ai. ¹¹ Ou te lē o fai atu ona o le lē tagolima, auā ua a'oa'oina a'u, e tusa lava po o ā tulaga e oo iā te a'u, ae ia lotomali i mea ua ou maua. ¹² O le mea moni, ua ou tofo i le lē tagolima, ua ou tofo fo'i i le tele o mea e maua. O mea uma lava ma tulaga uma lava, ua ou iloa ai ona feagai ma le ma'ona ma le matelāina, atoa ma le tele o mea, ma le pagatia i le lē tagolima. ¹³ O mea uma lava, ua ou maua le malosi mai iā te ia o lē na foa'i maia iā te a'u le mana. ¹⁴ Ae e ui i lea, sa matuā lelei tele lo outou fesoasoani mai iā te a'u i o'u puapuaga. ¹⁵ O outou Filipi e, ua outou iloa fo'i, i le taimi na amata ai ona ou folafola atu le tala lelei ma ou tuua ai Maketonia, e leai lava se faapopotoga na aufaatasi ma a'u i le foa'i atu ma le talia mai, e na o outou lava; ¹⁶ auā fo'i a o o'u iai i Tesalonia, e le'i faatasi ae e faalua ona outou auina mai iā te a'u o se mea na ou lē tagolima ai. ¹⁷ E lē ona ua ou naunau e sa'ili se meaalofa, ae ona o lo'u naunau faamaoni e sa'ili le fua e atili ai ona lelei o outou tulaga. ¹⁸ Ae peita'i, ua atoatoa mea uma iā te a'u ma ua matuā tele lava. Ua faamalieina a'u talu ai ua ou maua meaalofa mai iā te outou e ala iā Epaferoti, o se mea manogi lelei, o le taulaga talileleia, e matuā finagalo malie i ai le Atua. ¹⁹ O le mea lea, e foa'i atu e lo'u Atua iā te outou mea uma ua outou lē tagolima ai mai i le anoanoa'i o lona tamaoiga e ala iā Keriso lesu. ²⁰ O lenei, ia faamamaluina lo tatou Atua, o le Tamā lea, e faavavau, faavavau lava. Amene. ²¹ E momoli atu o'u alofaaga i le 'aupaia uma o ē ua autasi iā Keriso lesu. E momoli atu fo'i iā te

outou alofaaga o le 'auuso o loo matou faatasi. ²² O loo momoli atu alofaaga o le 'aupaia uma, aemaise lava i latou o le aiga o Kai-sara. ²³ Tau ina ia iai le agalelei faifua o le Alii o lesu Keriso i le agaga ua outou faaalia.